



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
22 Marsu 2017

Tribunál Distritál Baucau hamonu pena úniku tinan 28 prizaun ba arguidu iha krime abuzu seksuál ba menór ho natureza inestu

Iha 14 Marsu 2017, Tribunál Distritál Baucau kondena arguidu ba kazu krime abuzu seksuál ba menór ho natureza inestu ho pena úniku tinan 28 prizaun. Kazu ne'e envolve arguidu AM nu'udar aman hasoru nia-oan fetu rasik ne'ebé ho idade tinan 13.

“Pena ne'e aprópriadu no refleto nível gravidade hosi krime ne'ebé arguidu komete tanba arguidu nia hahalok ne'e prejudika tebe-tebes lezada nia-vida tomak. Tuir loloos arguidu mak tenke proteje lezada hosi kualker forma krime saida deit” dehan Luis de Oliveira Sampaio, Diretor Ezekutivu JSMP.

Inestu nu'udar atitude seksuál abnormal ne'ebé ofende tebe-tebes valores sosiál, morál no relijioza. Inestu mós hamosu prejuizú fíziku, psikolójiku no emosional ne'ebé grave tebe-tebes ba lezada durante tinan barak, liu-liu iha kazu ne'e, arguidu nia hahalok nunca bele justifika iha kualker forma.

Iha okaziaun barak ona JSMP preokupa no ezije entidade relevante no sociedade tomak atu fo atensaun ba krime ne'e. Partikularmente, JSMP husu atu altera Kódigu Penál no kriminaliza inestu, infelizmente la-iha konsiderasaun sériu ba asuntu ne'e.

Ministériu Públiku akuza arguidu kontra artigu 177 alinea 1 Kódigu Penál kona-ba krime abuzu seksuál ba menór no artigu 41 Kódigu Penál kona-ba krime kontinuadu, artigu 52 alinea 2 letra (l) no (m) Kódigu Penál kona-ba sirkunstánsia agravantes jéral iha âmbito dexendente no vulneravel konjuga ho artigu 2, 3, 35 no 36 Lei Kontra Violénsia Doméstika.

Tribunál prova katak iha lora, fulan no tinan ne'ebé la-apuradu, arguidu komete krime abuzu seksuál ba menór hasoru nia oan rasik ne'ebé sei iha idade tinan 13. Arguidu komete

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl

violasaun seksuál hasoru lezada ho meius tama ba lezada nia kuartu laran, taka lezada nia ibun no halo relasaun seksuál ho lezada no depoisde akontesimentu liu tiha minutu sanulu arguidu kontinua halo tan relasaun seksuál ho lezada.

Tuir-mai, maizumenus iha oras madrugada, arguidu tama ba lezada nia kuartu no kebit lezada nia-ain atu halo relasaun seksuál ho lezada maibé lezada rejeita. Tanba ne'e, arguidu siak atu baku lezada no haruka lezada ba haris fatin. Lezada sente tauk no halo tuir deit, no wainhira iha haris fatin laran arguidu kontinua halo relasaun seksuál ho lezada.

Depoisde akontesimentu segundu liu tiha semana ida, iha madrugada wainhira lezada toba hela arguidu tama ba lezada nia kuartu ho siak haruka lezada ba haris fatin. Arguidu tuir ba no hasai lezada-nia rounpa no haruka lezada toba iha semente leten, hafoin arguidu halo relasaun seksuál ho lezada. Aktu hirak ne'e kauza lezada grávida, no wainhira lezada grávida ona fulan 3 arguidu dehan ba lezada katak "*wainhira ema ruma husu oan ne'e se nian, lezada tenki hatan katak oan ne'e lezada nia aman ki'ik nian.*"

Tribunál mós prova katak wainhira lezada grávida hela fulan 5, iha tuku 13.00 meudia, wainhira lezada toba hela iha kuartu laran, arguidu tama ba lezada nia kuartu no halo tan relasaun seksuál ho lezada. Depoisde lezada partus liu tiha fulan 6, maizumenus iha tuku 04.00 madrugada, arguidu kontinua tama ba lezada nia kuartu no halo relasaun seksuál ho lezada. Kazu ne'e foin deskobre iha 25 Maiu 2016, wainhira lezada akompañia nia alin mai Dili atu ba rai liur.

Bazeia ba faktus provadu sira ne'ebé produs durante julgamentu, Tribunál konsidera katak arguidu komete krime abuzu seksuál ba menór tuir artigu 177 alinea 1 Kódigu Penál no Tribunál halo alterasaun jurídiku husi krime ho forma kontinuada agravasaun ba fali konkursu do krime tuir artigu 35 Kódigu Penál no artigu 173 número 1 letra (d) kona-ba vítima ho tinan ki'ik liu 17 no artigu 182 alinea 1 letra (d) Kódigu Penál kona-ba vítima ajente nia dexendente konjuga ho artigu 35 Lei Kontra Violénsia Doméstika.

JSMP louva Tribunál, tanba iha julgamentu ho agenda rona deklarasaun lezada no testemuña nian, Tribunál husu atu arguidu bele sai hosi sala julgamentu tanba lezada lakohi fó ninia deklarasaun wainhira arguidu nafatin sala julgamentu laran. JSMP konsidera ne'e hanesan prátika diak hodi bele hamenus lezada ninia presau no trauma hodi nune'e la tauk atu hato'o faktu ne'ebé loloos.

Krime ho natureza inestu normalmente fó presaun maka'as tanba envolve esplorasau pozisaun autóridade familiar, abuzu konfiansa no prejudika relasaun sosial iha família-laran. Dala barak, ema ne'ebé mak sai vítima husi kazu inestu mak labarik ne'ebé hetan abuzu husi ema ida ne'ebé mak sira fiar no depende no moris hamutuk ba.

Tuir observaun JSMP nian iha Tribunál hosi tinan 2012-2016 maizumenus 42 kazu inestu ne'ebé maioria vítima mak labarik feto ho idade minoridade. JSMP fiar katak número ne'e representa deit porsentu ki'ik hosi realidade loloos hosi krime inestu ne'ebé

naturalmente defisil atu deskobre hanesan dadauk iha kazu ida-ne'e. Iha fatór impedimentu oi-oin ne'ebé lezada ne'e infrenta hanesan presaun, ameasa, la-iha informasaun ne'ebé adekuada no impedimentu kulturál sira seluk.

JSMP hein katak ho prevalénsia dados ne'e bele ajuda instituisaun relevantes sira atu hola medida apropriadu hodi prevene krime ne'e iha sosiedade.

Kazu ne'e rejista iha Tribunál ho Nú. Prosesu: 0058/16. PDBAU. Julgamentu ne'e prezide hosi Juis Dr. Jose Quintão, representa juis kolektivu. Ministériu Públiku representa hosi Dra. Bemvinda do Rosario no arguidu hetan defeza hosi Dr. Jose Maria Guterres hosi Defensoria Públiku.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl